

Juã ojamu'tãca pũrĩ ni'i

A'ti pũrĩ a'tiro weero ojano'pã nise ni'i

Ãrĩ judío masũ Zebedeo macũ Santiago acabiji nicu niwĩ.

A'tere ojacu niwĩ. Jesucristore ãjõpeorãrẽ nisoose me'rã bu'erãrẽ tu'omasĩdutigu ojacu niwĩ. Tojo nicã Jesucristore ãjõpeonu'cũdutigu, queoro weenu'cũdutigu ojacu niwĩ. Ma'ise pe'ere apeye yu'rũoro weenu'cũdutigu ojacu niwĩ.

Cũta ape pũrĩ Jesucristo catiri umũco cjasere ojacu niwĩ.

Jesucristo ye queti ni'i

¹⁻² Yu'u musãrẽ Jesucristo ye cjasere, cũ nisetisere ojagu wee'e. A'tiro ni'i. A'ti turi weese dũporo cũ, cũ pacu me'rã nitojacu niwĩ. Be'ro a'ti turipare bajuacu niwĩ. Cũ catinu'cũgũ marĩrẽ catinu'cũcã weegũ nimi. Ũsã cãrẽ i'awũ. Cũ ucũsere tu'owu. Ũsã basu warota cãrẽ i'abutiawu. Cãrẽ añurõ masiwũ. Tojo weerã cãrẽ i'a'quere musãrẽ were'e. ³ Ũsã marĩ pacu Ő'acũ me'rã, tojo nicã cũ macũ Jesucristo me'rã añurõ nicã'a. Musã quẽ rãrẽ tojota uasãsa'a. Tojo weerã ũsã i'a'quere, tu'o'quere musãrẽ were'e. ⁴ Musãrẽ añurõ e'catiato nígu a'ti pũrĩrẽ oja'a.

Ő'acũ añugũ nimi nise queti ni'i

⁵ Jesucristo ùsãrẽ bu'e'quere musãrẽ were-turia'a. Cũ a'tiro niwĩ: “Õ'acũ añugũ nimi. Cũpure ne ña'ase marĩ'i. Cũ sĩ'ose weronojõ nimi. Na'itĩ'ase weronojõ nitimi”, niwĩ. ⁶ Marĩ a'tiro nibosa'a: “Õ'acũ me'rã añurõ nicã'a”, nibosa'a. Tojo nimirã ña'arõ wéérã, nisoorã weesa'a. Marĩ weesetise, marĩ ye ucũse useri me'rã tojo weesa'a. ⁷ Õ'acũ añurõ weemi. Marĩ Õ'acũ weronojõ añurõ wéérã pũricã, ãpẽrã me'rã añurõ nisetimasĩ'i. Cũ macũ Jesucristo wẽrise me'rã nipe'tise marĩ ña'arõ nisetisere dũcayunu'cũmi.

⁸ Marĩ ña'ase cõmirã ña'ase moo'o nírã, marĩ basuta niõoorã wee'e. Marĩ wãcũse diacjũ niwe'e. ⁹ Õ'acũ queoro weenu'cũgũ marĩ ña'arõ wee'quere diacjũ wereyũ'rucã, que-oroa marĩrẽ acobojogusami. Nipe'tise marĩ ña'arõ weeseti'quere coepe'ocũsami. ¹⁰ Õ'acũ a'tiro nicũ niwĩ: “Masã nipe'tirã ña'arã nima”, nicũ niwĩ. “Marĩ ña'arõ weewe'e” nírã, “Õ'acũ nisoosepijagũ nimi”, nírã weebosa'a. Cũ ucũsere ãjõpeotirã weronojõ nibosa'a.

2

Õ'acũ me'rã nírã a'tiro weeya nise ni'i

¹ Musã yũyũ põ'rã weronojõ ni'i. Ña'ase weeticã'to nígũ, musãrẽ a'tere oja'a. Marĩ ña'arõ weecãma, Jesucristo cũ pacũpure marĩrẽ ucũbosasami. “Narẽ acobojoya”, nisami. Jesucristo ña'ase moogũ nimi. Tojo weegũ cũ marĩrẽ sẽrĩbosamasĩsami.

² Jesucristo wẽrĩse me'rã marĩ ña'arõ wee'-
quere acoboJose bocacãrã niwũ. Marĩ di-
a'cũ acoboJose bocamasĩtisa'a. Nipe'tirã a'ti
turicjãrã acoboJose bocamasĩsama.

³ Marĩ masĩ'i, Õ'acũ dutisere wéerã, cãrẽ
ĩ'awã'no'sa'a. ⁴ Marĩ a'tiro nibosa'a: "Õ'acũrẽ
masĩ'i." Tojo nimirã cũ dutisere weetirã,
nisoosepiarã nibosa'a. ⁵ Cũ dutiro wéerã,
Õ'acũrẽ queorota ãjõpeosa'a. Tojo weerã marĩ
Õ'acũ me'rã ni'i nisere masĩ'i. ⁶ "Marĩ Õ'acũ
me'rã ni'i" nĩrã, Jesucristo weeseti'caronojõta
weesiruturoũa'a.

A'merĩ ma'iña nise queti ni'i

⁷ Acawererã, yu'u musãrẽ ojase apeye
ma'ma dutise mejõta ni'i. Toduporopu musã
dutise cuo'quereta oja'a. A'te musã tu'o'quepu
ni'i. ⁸ Tojo nimirõ, yu'u musãrẽ ojase ma'ma
dutise weronojõ wa'a'a. A'merĩ ma'isere
wãmepeogu wee'e. Toduporopu marĩ a'merĩ
ma'itirã, ña'arã niwũ. Na'itĩ'arõpu nĩrã
weronojõ niwũ. Ni'cãrõacãrẽ a'te du'uno'rõ
wee'e. A'tocaterore marĩ a'merĩ ma'irã,
bo'reyuropu nĩrã weronojõ ni'i. Te a'merĩ
ma'isere Jesucristo me'rã masĩno'o. Tojo nicã
musã me'rã masĩno'o.

⁹ Marĩ a'tiro nibosa'a: "Yu'u pũrĩcã añurõ
Õ'acũ dutiro weenu'cũcã'a." Tojo nimigũ
ãpẽrãrẽ ma'itigu, toduporopu na'itĩ'arõpu nĩ-
caro weronojõta nicã'sa'a tja. ¹⁰ Æpẽrãrẽ
ma'ígũ, bo'reyuropu nigũ weronojõ nimi. Ne
cũrẽ cã'rõacã ña'arõ weese marĩ'i. ¹¹ Marĩ
ãpẽrãrẽ ma'itirã, na'itĩ'arõpu nĩrã weronojõ

nisetisa'a. Marĩ ña'arõ weese bu'iri caperi bajuno'tirã weronojõ nisa'a. Tojo weerã "A'tiro pe'e ɯa'a", nımasĩtisa'a.

12-14 Yɯ'ɯ musã nipe'tirãrẽ ojaguti. Jesucristo cũ wẽrise wapa Õ'acũ musã ña'arõ wee'quere acobojoɯ niwĩ. Musã Õ'acũrẽ masĩ'i. Bucurã, musãrẽ oja'a. Jesucristore ne waropu du'pocãti'cure ẽjõpeoyucã, oja'a. Ma'mapjia, musã wãcũtutuarã ni'i. Õ'acũ ye ucũsere tu'o ẽjõpeo'o. Wãtirẽ docaque'acã weecãrã niwũ. Tojo weegɯ musãrẽ oja'a.

15-16 A'ti ɯmũco cjase Õ'acũ ye mejeta ni'i. A'tere wãcũnurũticã'ña. Ña'arõ wãcũse, a'metãrãsi'rise, ɯaripejase, ăpẽrã yu'ruoro nicã'gũ nisi'rise ña'a ni'i. A'te nipe'tise a'ti ɯmũco cjase ni'i. "Tere weerãti", niticã'ña. No'o a'tere weesi'rigũnojo marĩ pacu Õ'acũrẽ ma'itisami. 17 A'ti turi pe'tiwã'cãrõ wee'e. Nipe'tise ña'arõ weesi'rĩ ɯaripejase quẽ'rã pe'tia wa'arosa'a. Õ'acũ dutiro weerã pũricã ne pe'titirãsama. Cũ tiropu ninu'cũcã'rãsama.

Nisoorã ye queti ni'i

18 Nisoori masã ye quetire wereguti. A'ti ɯmũco pe'tiro wee'e. A'ti turi pe'tise duporo ni'cũ Jesucristore ĩ'atu'tigu a'tigusami. Musã a'tere tu'otojacãrã niwũ. Pãjãrã cũ weronojõ nirã nitojama. Tojo weerã marĩ a'ti turi maata pe'tiatjere masĩ'i. 19 Na cũrẽ ĩ'atu'tirã marĩ me'rãcjãrãta nicã'miwã. Be'ro, na Jesucristo ye quetire ẽjõpeotirã, marĩrẽ ducawatia wa'awã. Na marĩ me'rãcjãrã waro mejeta

ni'cārã niwã. Marĩ me'rãcjãrã nĩrã pũricã, marĩ me'rãta nibosama. Na tojo ducawaticã ã'arã, marĩ narẽ ã'amasĩ'i. Marĩ me'rãcjãrã mejẽta nicãrã niwã.

²⁰ Jesucristo musãrẽ Espĩritu Santure o'ócũ niwĩ. Tojo weerã musã diacjũ cjase, Jesucristo ye quetire masĩpe'ticã'sa'a. ²¹ Cũ ye quetire masĩtirãrẽ ojaɣũ weewe'e. Musã Jesucristo yere queoro masĩsa'a. Tojo weegũ musãrẽ oja'a. Musã masĩ'i, cũ ye queti nisoose mejẽta ni'i.

²² Nisoosepijagũ a'tiro nisami: "Jesú Ō'acũ bese'cũ mejẽta nimi", nisami. Tojo busugũ cũrẽ ã'atu'tiri masũ nimi. Marĩ pacũ Ō'acũrẽ, cũ macũ Jesucristore teesami. ²³ No'o cũ macũ Jesucristore uatirã, cũ pacũ quẽ'rãrẽ moosama. Marĩ Jesucristore Ō'acũ bese'cũ nimi nĩrã, Ō'acũ põ'rã ni'i. ²⁴ Tojo weerã musã ne waro tũ'o'que Jesucristo ye quetire wãcũnrũña. Musã cũ ye quetire ãjõpe-onu'cũrã, Ō'acũ me'rã, cũ macũ Jesucristo me'rã añurõ nicã'rãsa'a. ²⁵ Jesucristo marĩrẽ a'tiro nicũ niwĩ: "Catinu'cũatjere o'oguti", nicũ niwĩ.

²⁶ Musãrẽ nisoori masã ye quetire ojatojapũ. ²⁷ Musã Espĩritu Santu Jesucristo o'ócũre cũotoja'a. Cũ basu nipe'tisere nisooro marĩrõ musãrẽ bu'emi. "Ûsãrẽ ãpẽrã bu'eato", niti-sa'a. Cũ bu'eronojõta Jesucristo me'rã añurõ nicã'ña.

²⁸ Ni'cãrõacã quẽ'rãrẽ cũ me'rã ninu'cũcã'ña. Marĩ tojo wéerã, cũ a'ti

nucũcãpũ a'ticã, cũrẽ põtẽrĩrã ï'aucuasome. Bopoyasome. ²⁹ Musã Jesucristo añurõ weesere masitoja'a. Tojo weerã nipe'tirã añurõ weerã Ô'acũ põ'rã nima nisere masĩno'o.

3

Ô'acũ põ'rã weesetise ni'i

¹ Ì'arẽ musã Ô'acũ marĩ pacũ marĩrẽ ma'isere. Marĩrẽ ma'igũ, "Yu'u põ'rã" ni ãjõpeosami. Tojo nĩrõnojõta marĩ cũ põ'rã ni'i. Æpẽrã a'ti turicjãrã Ô'acũrẽ masitĩjãrã, marĩ cũrẽ ãjõpeorã weesetisere masĩtisama.

² Acawererã, marĩ Ô'acũ põ'rã nitoja'a. Cũ põ'rã nimirã, be'ropũ marĩ de'ro wa'atjere añurõ masĩno'ña marĩ'i yujupũ. A'te dia'cũrẽ masĩ'i. Marĩ Jesucristo a'ticã, cũ bajusere ï'arãsa'a. Cũrẽ ï'arã, cũ weronojõ wa'arãsa'a.

³ Jesucristore ne ña'ase marĩ'i. Marĩ quẽ'rã cũ weronojõ añurã wa'arãsa'a niatjere wãcũ'u. Tojo weerã marĩ ña'arõ weeseti'quere ducayuwã'cãrã wee'e.

⁴ Ña'arõ weesetise Ô'acũ duti'quere yu'rũnũ'cãse ni'i. Nipe'tirã ña'arõ weerã Ô'acũrẽ yu'rũnũ'cãrã weema.

⁵ Musã masitoja'a, marĩ ña'arõ wee'quere cõ'agũ Jesucristo a'ti nucũcãpũre a'ticũ niwĩ. Ne cũrẽ cã'rõacã ña'ase marĩ'i. ⁶ Tojo weerã nipe'tirã cũ me'rã ninu'cũrã ña'arõ weesetitisama. Ña'arõ weerã pe'e Jesucristore masĩtisama.

⁷ Musã tu'omasĩña. Æpẽrã musãrẽ maasocã, ãjõpeoticã'ña. Jesucristo añugũ nimi. Tojo

weerã cũ weronojõ nirã masã añurã nima.
 8 Wãtĩ ne waropũta ña'agũ nimujãti'cũ nimi.
 Tojo weerã ña'arõ weesetirã cũ yarã nima.
 Jesucristo Õ'acũ macũ wãtĩ ña'arõ weesere
 cõ'agũ a'tigũ a'ti turipũre a'ticũ niwĩ.

9 Õ'acũ cũ põ'rãrẽ cũ weronojõ niseticã
 weecu niwĩ. Tojo weerã Õ'acũ põ'rã ña'asere
 weenu'cũtima. 10 Marĩ Õ'acũ põ'rãrẽ, wãtĩ
 yarãrẽ a'tiro ñ'aducawaamasĩ'i. No'o ãpẽrãrẽ
 ma'itirã, ña'arõ weesetirãrẽ “Wãtĩ yarã nima”,
 ni'i. ãpẽrãrẽ ma'irã añurõ weesetirã pe'ere
 “Õ'acũ põ'rã nima”, ni'i.

A'merĩ ma'idutise ni'i

11 A'merĩ ma'irõũa'a nise queti musã ne
 waro maata tu'o'que ni'i. 12 Duporocjũpu Caĩ
 wãmetigũ weronojõ niticã'rã. Cũ wãtĩ yagũ
 nĩgũ, cũ acabiji Abere wẽjẽcũ niwĩ. ¿De'ro
 weegũ cũrẽ wẽjẽpari? Caĩ cũ weesetise
 ña'ase nicaro niwũ. Cũ acabiji weese pe'e
 añuse nicaro niwũ. Te bu'iri cũrẽ uogũ,
 wẽjẽcũ niwĩ. 13 ãpẽrã musã añurõ weesetisere
 ñ'ãũorã, ñ'atu'tibosama. Na Caĩ cũ acabijire
 uo'caro weronojõ weerã weesama. Na musãrẽ
 ñ'atu'ticã, ucuaticã'ña.

14 Marĩ ãpẽrãrẽ ma'irã, Õ'acũ põ'rã ni'i
 nisere masĩ'i. Toduporopũre Jesucristore
 masĩitĩjarã, ãpẽrãrẽ ma'itiwũ. Ni'cãrõacãrẽ
 cũrẽ ãjõpeoyurã, a'merĩ ma'i'i. ãpẽrãrẽ
 ma'itirã pũricã, marĩ toduporopũ ní'caronojõta
 nicã'bosa'a. Catinu'cũsere moobõsa'a. 15 No'o
 ãpẽrãrẽ ñ'atu'tigũnojõ masãrẽ wẽjẽcõ'arĩ masũ

weronojõ nimi. Musã masĩ'i, ne ni'cũ masãrẽ wẽjẽcõ'arĩ masũ catinu'cũsere moosami. Musã cũ weronojõ niticã'ña. ¹⁶ Jesucristo marĩ ye niatjere wẽricu niwĩ. Tojo weerã marĩ a'merĩ ma'isere masĩ'i. No'o ãpẽrãrẽ ma'írã, marĩ ya catiri umucore wãcũnurũtisa'a. Narẽ weetamurã, marĩ quẽ'rã wẽrimasĩ'i. ¹⁷ Marĩ apeyenojõ cuomirã, pajasecucorãrẽ o'otirã, ¿de'ro wee "Õ'acũrẽ ma'i'i", nibosau? ¹⁸ Bu'i, marĩ ye ucũse useri me'rã dia'cũ "Narẽ ma'i'i", niticã'rõua'a. Narẽ añurõ weetamurõua'a. Te me'rã marĩ narẽ ma'isere i'omasĩ'i.

Õ'acũrẽ ejõpeorã uiro marĩrõ nímasĩ'i nise ni'i

¹⁹⁻²⁰ Apetero marĩ a'tiro wãcũsa'a: "Yũ'u ña'ayu'ruagu nisa'a." Tojo wãcũmirã, marĩ ãpẽrãrẽ ma'írã, Õ'acũ me'rã uiro marĩrõ nímasĩ'i. Marĩ cũ põ'rã ni'i. Cũ marĩ wãcũsere masĩpe'ocã'sami. Cũ marĩ ña'arõ wee'quere acobojosami. ²¹⁻²² Marĩ ne bu'iri moosa'a ni tu'oña'rã, uise marĩrõ Õ'acũrẽ sẽrimasĩ'i. Cũ dutisere, cũ uasere weecã, Õ'acũ nipe'tise marĩ sẽrisere yu'tigusami. ²³ Cũ duti'que a'te ni'i. Cũ macũ Jesucristore ejõpeodutimi. Tojo nicã cũ duti'caronojõta marĩrẽ a'merĩ ma'idutimi. ²⁴ Marĩ cũ duti'quere wéerã, cũ me'rã añurõ nicã'a. Cũ quẽ'rã marĩ me'rã añurõ nicã'mi. Marĩrẽ Espíritu Santure o'ocu niwĩ. Tojo weerã cũ marĩ me'rã nisere masĩ'i.

4

Ãpẽrã weresere i'abesetojarãpu weedutise

ni'i

¹ Acawererã, Õ'acũ yere wereri masã musã tiropu bu'erã etacã, na weresere “¿Diacjũta Õ'acũ ye nimitito?” ni ï'aña. Æpẽrã Õ'acũ o'ó'cãrã nitima. Nipe'tirãpũre ãjõpeoticã'ña. Na Espĩritu Santure moomirã, tojo nima'acã'-bosama. A'ti umucopũre no'o uaro nisoori masã nibi'acã'ma. “Õ'acũ yere wererã wee'e”, ni bususijama. ² Musã na diacjũ wererãrẽ a'tiro ï'abeseya. Na “Jesucristo a'ti upũ me'rã bajuacu nimi”, nisama. Tojo ãjõpeorã, Espĩritu Santure cuorã nima. Narẽ ãjõpeoya. ³ Æpẽrã tojo ãjõpeotirã, Espĩritu Santure mooma. Mejõ cũrẽ pe'sutima. Musã Jesucristore ï'atu'tigu cũ a'tiatjere tu'otojapã. Na cũ weronojõ nirã a'ti di'tapũre nitojama.

⁴ Nisoori masã wãtĩ yarã nima. Õ'acũ wãtĩ nemorõ tutuami. Musã Õ'acũ yarã ni'i. Tojo weerã musã na ucũsere ãjõpeoticãrã niwũ. ⁵ Nisoori masã a'ti turicjãrã a'ti umuco cjase dia'cũrẽ bu'esama. Na weronojõ nirãta na bu'esere tu'osama. ⁶ Marĩ pũrĩcã Õ'acũ põ'rã ni'i. Cũ põ'rã nirã marĩ bu'esere tu'osama. Cũ põ'rã nitirã tu'otisama. Tojo weerã marĩ diacjũ cjase ãjõpeorãrẽ, diacjũ nitisere ãjõpeorãrẽ ï'abesemasĩ'i. “Ã'rãta nima diacjũ cjasere ãjõpeorã”, nĩmasĩ'i. “Na nima diacjũ cjasere ãjõpeotirã”, ni ï'aducawaamasĩ'i.

Marĩrẽ a'merĩ ma'idutise ni'i

⁷⁻⁸ Acawererã, Õ'acũ masãrẽ ma'imi. Tojo weerã marĩ quẽ'rã a'merĩ ma'irõua'a. A'merĩ

mairãnojõ Õ'acũ põ'rã nima. Na Õ'acũrẽ masĩma. No'o ma'ise moorãnojõ Õ'acũrẽ ne masĩtima. ⁹ Cũ marĩrẽ ma'isere ï'ogũ, cũ macũ ni'cũ nigũrẽ a'ti turipure o'ócũ niwĩ. Marĩ catinu'cũatjere wéégũ tojo weecũ niwĩ. ¹⁰ Yu'u ma'isere ucũgũ, marĩ Õ'acũrẽ ma'isere ucũgũ mejeta wee'e. Cũ pe'e marĩrẽ ma'isere ucũgũ wee'e. Cũ marĩrẽ ma'ígũ, marĩ ña'arõ wee'-quere acobojodutigũ cũ macũrẽ o'ócũ niwĩ. Cũ me'rã marĩ acobojose boca'a.

¹¹ Acawererã, Õ'acũ marĩrẽ ma'i'caronojõta marĩ quẽ'rã ãpẽrãrẽ ma'irõua'a. ¹² A'ti umucopure ne ni'cũ Õ'acũrẽ ï'a'cũ marĩmi. Marĩ cũrẽ ï'ati'cãrã nimirã, ãpẽrãrẽ ma'írã, cũ marĩpure nisere masĩi. Cũ marĩrẽ ma'ique ye bu'iri ãpẽrãrẽ queoro ma'ita basio'o. ¹³ Õ'acũ marĩrẽ Espĩritu Santure o'ocũ niwĩ. Tojo weerã marĩ Õ'acũ marĩpure nisere masĩi. Marĩ quẽ'rã cũpureta ni'i. ¹⁴ Õ'acũ macũrẽ ãsã basuta ï'awũ. Cũrẽ a'ti turipure marĩ ña'arõ wee nisetimi'cãrãrẽ yu'ruweticã weedutigũ o'ócũ niwĩ. Tojo weerã musãrẽ a'tere were'e. ¹⁵ No'o nipe'tirã “Jesú Õ'acũ macũ nimi” nirãnojõ Õ'acũ me'rã nima. Cũ quẽ'rã napure nimi.

¹⁶ Õ'acũ marĩrẽ ma'isere masĩi. Cũ nipe'tirãrẽ ma'imi. No'o ãpẽrãrẽ maigũnojõ añurõ Õ'acũ me'rã nimi. Õ'acũ quẽ'rã cũ me'rã nimi. ¹⁷ Marĩ Õ'acũ me'rã nírrã, queoro ma'imasĩi. Jesucristo a'ti turipũ nicã, cũ pacũ quẽ'rã cũ me'rã nicũ niwĩ. Cũ me'rã ní'carono-

jõta marĩ me'rã quẽ'rãrẽ Õ'acũ nimi. Tojo weerã marĩ a'ti turicjãrãrẽ beseatji nũmũ nicã, cũrẽ ne uisome. ¹⁸ A'merĩ mairã tirore uise marĩ'i. Uise cũorã tiro pe'ere ne a'merĩ ma'ise marĩ'i. Marĩ uise me'rã bu'iritirã weronojõ tũ'oña'a. No'o uigũnojo a'merĩ ma'imasĩtimi.

¹⁹ Õ'acũ marĩrẽ ma'imũ'tãcũ niwĩ. Tojo weerã marĩ cũrẽ ma'i'i. ²⁰ Marĩ Õ'acũrẽ ma'imirã, ãpẽrãrẽ i'atu'tirã, nisoosebucurã ni'i. Masã marĩ i'arã waromaricãrẽ ma'itirã, nemorõ Õ'acũ bajutigũ pũricãrẽ ma'ita basiotisa'a. ²¹ Jesucristo marĩrẽ a'tiro dutiwĩ: "Õ'acũrẽ ma'irã, ãpẽrã quẽ'rãrẽ ma'irõũa'a", niwĩ.

5

Õ'acũ põ'rã nĩrã, ña'asere weeticã'rõũa'a nise ni'i

¹ Nipe'tirã "Jesú Õ'acũ bese'cũ nimi" ni ãjõpeorãnojo Õ'acũ põ'rã nima. ãpẽrãrẽ ma'irã, na põ'rã quẽ'rãrẽ ma'irõũa'a. ² Marĩ Õ'acũrẽ ma'i, cũ duti'quere wéerã, marĩ cũ põ'rãrẽ ma'i'i nisere masĩno'o. ³ Õ'acũrẽ ma'irã, cũ duti'quere weerã wee'e. Cũ dutise diasawe'e, weeta basiopũricã'sa'a. ⁴ Marĩ Õ'acũ põ'rã a'ti turi cjase ña'asere weewe'e. Jesucristore ãjõpeose me'rã añurõ weeta basio'o. ⁵ Marĩ Jesucristore "Õ'acũ macũ nimi", ni ãjõpeo'o. Te me'rã dia'cũ a'ti umũco cjase ña'asere cã'mota'amasĩsa'a.

Jesucristore "Õ'acũ macũ nimi" nise ni'i

⁶ Jesucristo Õ'acũ macũ nimi. Cũ a'ti turipu nicã, Juã wãmeyeri masũ cũrẽ wãmeyewĩ. Cũrẽ wãmeyegu, aco me'rã wãmeyewĩ. Be'ro cũ curusapu wẽrĩwĩ. A'tiro weese me'rã cũ Õ'acũ macũ nisere ã'owĩ. Cũrẽ wãmeye'que me'rã dia'cũ ã'otiwĩ. Cũ wẽrise me'rã quẽ'rãrẽ ã'owĩ. Espiritu Santu Jesucristo Õ'acũ macũ nisere ã'omi. Cũta diacjũ cjasere weregu nimi. ⁷ A'te quetire na basuta ã'oma. Na ã'tiarã u'musepu nima: pacu, macũ, tojo nicã Espiritu Santu. Æ'rã ã'tiarãpu ducawatimirã, ni'cũta nimi. ⁸ A'ti nucũcãpũre Espiritu Santu werese me'rã Jesú Õ'acũ macũ nimi nisere mas'ĩ. Tojo nicã Jesú cũ Õ'acũ macũ nisere cũ wãmeyeno'que me'rã, cũ wẽrĩ'que me'rã ã'ocu niwĩ. ⁹ Masã na ã'a'quere werecãmarĩcãrẽ, marĩ ãjõpeo'o. Õ'acũ cũ macũ yere werecã pũrĩcãrẽ, nemorõ ãjõpeoroua'a. Cũ masã ucũse nemorõ queoro weremi. ¹⁰⁻¹² Õ'acũ marĩrẽ cũ macũ me'rã catinu'cũsere o'ocu niwĩ. Tojo weerã cũ macũrẽ ãjõpeorã cũ me'rã catinu'cũrãsama. Cũ macũrẽ ãjõpeotirã ne cũ me'rã catinu'cũsome. Marĩ Jesucristo ye quetire diacjũta ni'ĩ nĩrã, cũrẽ ãjõpeorã wee'e. Æpẽrã a'tere ãjõpeotirãnojõ "Õ'acũ nisoogu nimi", nĩrã weema.

Juã werecasa'que ni'ĩ

¹³ Musã Õ'acũ macũrẽ ãjõpeorãrẽ tere ojavu. Musã catinu'cũrãsa'a nisere masãto nĩgũ tojo ojavu.

14 Marĩ masĩ'i, Õ'acũ cũ ɯaronojõ marĩ sēřicã, marĩ sēřisere tu'osami. "Marĩ sēřisere tu'osami" ni masĩrã, cūrē uise marĩrõ sēřimasĩ'i. 15 "Õ'acũ marĩ sēřisere tu'osami" ni masĩrõnojõta "Cũ marĩ sēři'que que'rãrē o'otojami", nino'o.

16 Apetero Jesucristore ějõpeogu ña'arõ weesami. Cũ tojo weecã ĩ'arã, Õ'acūrē sēřibosaya. Marĩ sēřibosacã, Õ'acũ yu'tigusami. Cūrē ducayugusami tja. Apeye pūrıcã ña'abutiario weese ni'i. Téma "Sēřibosaya" niña marĩ'i. Tere weerã Õ'acũ tiropu wa'asome.

17 Nipe'tise ña'ase Õ'acūrē yu'rũnu'cãse ni'i. Yu'u nırõnojõta apeye ña'arõ weesere Õ'acũ acobojogusami. Apeye ña'abutiario weesere acobojosome.

18 Marĩ masĩ'i, Õ'acũ põ'rãrē Jesucristo añurõ co'tenu'cũcã'mi. Tojo weerã na ña'arõ weenu'cũtisama. Wãtĩ quē'rã Jesucristo co'teyucã, narē ña'arõ weemasĩtisami.

19 Marĩ Õ'acũ põ'rã nisere, tojo nicã wãtĩ nipe'tiro a'ti turicjãrã wiogu nimi nisere masĩ'i.

20 Apeye quē'rãrē, Õ'acũ macũ cũ a'ti'quere masĩ'i. Cũ marĩrē Õ'acũ diacjũ nigūrē masĩdutigu tu'omasise o'ocu niwĩ. Marĩ Jesucristo me'rã nırã, cũ pacu Õ'acũpũreta ni'i. Jesucristo Õ'acũ nimi. Cũta catinu'cũgũ marĩ catinu'cũatjere o'omi. 21 Apeye, masã na queose yee ějõpeo'quenojõrē ějõpeoticã'ña.

Õ'acũ se'sarore ĩjõpeoya. Nipe'tise apeyenojõ
yu'ruoro Õ'acũrẽ ma'ĩna.
Tojota weerouasa'a.
Tocã'rõta oja'a.
Juã

Õ'âkĩ hi yeere uúkũri turi Tukano
New Testament in Tucano (BR:tuo:Tucano)

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 22 Sep 2022 from source files dated 9 Oct 2020

00ebd04f-7b0d-5a72-9407-eb53ae2bd086